



Aningaasanut Nunanullu Allanut Naalakkersuisoq

Aningaasaqarnermut Ataatsimiititaliap suliaq nr. 01.31.06/07-00243 pillugu ataasinngornermi ulloq 28. maj 2007-imi aalajangiinera pillugu Naalakkersuisunut ilisimatitsineq.

(Naalakkersuisut ulloq 24. april 2007-imi ataatsimiinneranni imm. 2c)

Meeqqat atuarfianni atuartut nerisaqartinneqarnissaannut ilassutitut aningaasaliissuteqartoqarnissaanik qinnuteqaat

Naalakkersuisut **inassutigaa**,

kontomi pingaarnermi nutaami XX.XX.XX-imi, Meeqqat atuarfianni atuartut nerisaqartinneqarnissaannut tunngasumi, 3,3 mio. kr.-it aningaasaliissutitut immikkoortinneqassasut
kontomi pingaarnermi 20.11.70-mi, Suliniutinut nutaanut sillimmatinut tunngasumi, aningaasaliissutit 3,3 mio. kr.-inik ikilineqassasut.

Aningaasaqarnermut Ataatsimiititaliap oqaaseqaatai

Meeqqat atuarfianni atuartut nerisaqartinneqarnissaannut 3,3 mio. kr.-it Naalakkersuisut suliami matumani qinnutigaa. Aaqqissuussineq kommunit Namminersornerullutillu Oqartussat akornanni 50/50-imik aningaasalersorneqassaaq.

Aaqqissuussineq atuartunik nerisaqartitsinissaq (UKIU 06/87) pillugu Inatsisartut ulloq 15. marts 2006-imi oqaluuserinninnerannik aallaaveqartoq aningaasaliissuteqarnissamik qinnuteqaammi allassimavoq. Atuartut nerisaqartinneqarnissaannik aaqqissuussinerup sapinngisamik pilertornerpaamik pilersinneqarnissaa pingaaruteqartoq immikkoortup pineqartup oqaluuserineqarnerani taamani Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisuusup oqaatigaa.

Tamanna tunngavigalugu suleqatigiissitamik suligasuartussaagunartumik pilersitsisoqarpoq. Sunali pissutiginerlugu suleqatigiissitap sulinera qaammatit qulingiluat aatsaat qaangiunnerisigut Naalakkersuisunut ulloq 18. januar 2007-imi ilisimatitsissuteqarnikkut kinguneqartinneqarpoq.

Tamanna tunngavigalugu Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqarfik Naalakkersuisut isummernissaannut tunngavissiamik 20. april 2007-imi suliaqarpoq. Isummernissamut tunngavissiaq taanna qinnuteqaatitut ilusilerlugu Aningaasaqarnermut Ataatsimiititaliamut ulloq 22. maj 2007-imi nassiunneqarpoq.

Taamaalillunilu oqaatigineqartariaqarpoq aningaasaliissuteqarnissamik qinnuteqaatip naatsuaqqap suliarineqarneranut Naalakkersuisut allattoqarfiata ukioq ataaseq sinnerlugu

atorsimagaa! Tamatuma saniatigut qinnuteqaatip Aningaasaqarnermut Ataatsimiititaliamut ingerlateqqinneqarnissaanut qaammat ataaseq Naalakkersuisut atorsimavaat!

Taamaalillutillu Aningaasaqarnermut Ataatsimiititaliamit ajuusaarutigalugu oqaatigineqassaaq Naalakkersuisut suliami matumani suliniuteqarnissamut pisussaaffeqarnertik eqquutsissinnaasimangikkaat!

Pisoq ajuusaarnartoq tamanna suli ajuusaarnarnerulerpoq aaqqissuussinermit tapiissutinik kommunit siullermeertumik qinnuteqarsinnaanerat ulloq 1. maj 2007-imut killilerniarneqarmat. Tassa aningaasanik qinnuteqaatip Aningaasaqarnermut Ataatsimiititaliamut nassiunneqarneranit sapaatit akunnerisa pingasut **qaangiunneranni** aammalu suliap Naalakkersuisunit suliarineqarneranit sapaatip akunnerata qaangiunnerani. Taamaalilluni suliap Aningaasaqarnermut Ataatsimiititaliami kommuninilu naalakkersuinikkut pisariaqartumik suliarineqarnissaanut Naalakkersuisoqarfik ataqqinnissimangilaq. Tamatuma saniatigut kigaalaarussineq aningaasaliissutitigut ajornartorsiortitsilissaaq. Siunertamut aningaasanik atuisoqareersimappat taakku aningaasaliissutitigut tunngavissaqarani akilerneqarsimassapput. Taamatut akuersissuteqarani atuisoqarsimangitsoq Naalakkersuisut paatsuugassaangitsumik uppersarsassagaat Aningaasaqarnermut Ataatsimiititaliamit qinnutigineqassaaq.

Aningaasaqarnermut Ataatsimiititaliap aalajangiinera

Naalakkersuisut inassuteqaataat Aningaasaqarnermut Ataatsimiititaliamit **akuersissutigineqarput.**

Naalakkersuisut siuliani taaneqartutut uppersarsaataat ullumimit ullut suliffiusut qulit qanngiutsinnagit kalaallisut danskisullu kiisalu qarasaasiakkut ataatsimiititaliap allattoqarfianut uunga nassiuteqquneqarpoq: nch@gh.gl

Inussiarnersumik inuulluaqqusillunga

Augusta Salling
Aningaasaqarnermut Ataatsimiititaliap siulittaasua